



ODBOJKAŠKI SAVEZ BOSNE I HERCEGOVINE
VOLLEYBALL FEDERATION OF BOSNIA AND HERZEGOVINA
Affiliated in FIVB



PRAVILNIK **o zdravstvenoj zaštiti u OS BiH**

Sarajevo, februar 2014. godine

Na osnovu članova 47., 48. i 49. Zakona o sportu u Bosni i Hercegovini i člana 36. Statuta Odbojkaškog saveza Bosne i Hercegovine, Upravni odbor Odbojkaškog saveza Bosne i Hercegovine dana 21.02.2014. godine, donio je

PRAVILNIK o zdravstvenoj zaštiti u OS BiH

Član 1.

Ovim Pravilnikom se uređuju pitanja vezana za zdravstvenu zaštitu sportista i sportskih radnika Odbojkaškog saveza Bosne i Hercegovine u skladu sa obavezama koje proističu iz Zakona o sportu BiH, akata Odbojkaškog saveza Bosne i Hercegovine, FIVB-a i CEV-a, a primjenjuju se u svim takmičenjima u organizaciji OS BiH.

Član 2.

Aktivni igrači i igrachice, treneri, sudije i delegati-kontrolori moraju se redovno medicinski pregledati, na osnovu čega se određuju njihova zdravstvena, fizička i psihička sposobnost za trening i takmičenje.

Član 3.

Obavezni sistematski pregledi igrača i igrachica obavljaju se dva puta godišnje, a trenera sudija i delegata-kontrolora jednom godišnje.

Obavezni sistematski pregledi igrača i igrachica obavljaju se početkom januara i početkom jula, a trenera, sudija i delegata-kontrolora pred početak takmičarske sezone.

Član 4.

Obavezni sistematski pregled igrača, igrachica, trenera, sudija i delegata-kontrolora obavljaju se u skladu sa propisima nadležnih entitetskih ministarstava i Distrikta Brčko i u skladu sa propisima međunarodnih sportskih federacija, u medicinskim ustanovama ovlaštenim propisima.

Član 5.

Medicinsku zaštitu igrača i igrachica na utakmicama i rad sa njima u klubu mogu vršiti ljekari i stručno medicinsko osoblje (maseri-fizioterapeuti) koji imaju licencu Odbojkaškog saveza Bosne i Hercegovine.

Član 6.

Svi klubovi su obavezni da vode posebne zdravstvene kartone za igrače odnosno igrachice u skladu sa propisima nadležnog entitetskog ministarstva ili Distrikta Brčko.

Uz takmičarsku licencu obavezan je dokaz o zdravstvenoj sposobnosti učesnika u takmičenju (ovjerena takmičarska licenca za takmičenje u Premijer ligi BiH i Kup-u BiH, odnosno na takmičarskoj legitimaciji u takmičenju mlađih kategorija).

Član 7.

Ako ljekar prilikom obaveznog sistematskog pregleda ustanovi da igrači-igrachice, trener, sudija i delegat-kontrolor nije fizički i psihički sposoban za takmičenje neće mu se dozvoliti sportske aktivnosti sve dok se zdravstveno stanje ne popravi.

Član 8.

Za svaku odbojkašku utakmicu, bez obzira na rang takmičenja, uzrast i kategoriju, klub domaćin je obavezan osigurati prisustvo ljekara sa propisanom priručnom apotekom u sportskoj dvorani.

Član 9.

Svaka sportska dvorana u kojoj se igraju odbojkaške utakmice mora imati priručnu apoteku za pružanje prve pomoći i nosila ili to mora obezbijediti klub domaćin utakmice.

Sastav priručne apoteke utvrđuje se posebnim upustvom Medicinske komisije Odbojkaškog saveza Bosne i Hercegovine.

Član 10.

Zabranjeno je u cilju postizanja boljih rezultata i podizanja snage takmičara, uzimati stimulaturna farmakološka-doping sredstva koja nisu na pozitivnoj listi lijekova koje mogu uzimati sportisti.

Spisak tih sredstava objavljuje Agencija za anti-doping kontrolu Bosne i Hercegovine.

Član 11.

Licence Odbojkaškog saveza iz člana 5. ovog Pravilnika izdaju se na godinu dana. Medicinska komisija Odbojkaškog saveza može ukinuti licencu izdatu medicinskom radniku ukoliko utvrdi da se ogriješio o kodeks ponašanja medicinskih radnika.

Ako nema licencu, ljekar prisutan na utakmici dokazuje svoj lični i profesionalni identitet ličnom ispravom (lična karta ili putna isprava) i ljekarskim faksimilom-pečatom.

Član 12.

Dežurni ljekar u sportskoj dvorani dužan je da pruži prvu pomoć povrijeđenom učesniku u utakmici, uključujući u slučaju potrebe i gledaoce.

Dežurni ljekar na utakmici u slučaju potrebe da interveniše ulazi u teren samo na poziv odbojkaškog sudije.

Kod svih težih sportskih povreda dežurni ljekar dužan je povrijeđenog uputiti u najbližu medicinsku ustanovu.

Član 13.

Klubski ljekar je stručno medicinsko lice koje radi u odbojkaškom klubu:

- a) u stalnom radnom odnosu,
- b) u honorarnom angažovanju,
- c) kao amaterski volonter.

Član 14.

Klubski ljekar može biti specijalista sportske medicine, specijalista medicine rada, specijalista fizikalne medicine, ortoped, ljekar opšte prakse i specijalista hirurških grana, specijalista iz internističke oblasti i ljekari drugih specijalnosti koji imaju završenu doedukaciju iz oblasti sportske medicine i za to izdatu licencu od nadležne entitetske ustanove ili nadležne ustanove Distrikta Brčko.

Član 15.

Klubski ljekar je član stručnog štaba i član medicinske komisije klubova.
Ljekar reprezentacije je član stručnog štaba odgovarajuće reprezentativne selekcije Odbojkaškog saveza Bosne i Hercegovine.

Član 16.

Dužnosti ljekara su:

- a) da organizuje sprovođenje sistematskih i kontrolnih pregleda,
- b) da vodi klubsku medicinsku dokumentaciju u skladu sa propisima nadležnog entitetskog ministarstva,
- c) da vodi stalnu brigu o zdravstvenom stanju svih igrača odnosno igračica, da povrijeđenim i bolesnim pruži stručnu pomoć i odredi način liječenja,
- d) da preko medicinskih pregleda i testiranja funkcionalnih sposobnosti prati stanje i pripremljenost igrača,
- e) da posebnu pažnju u svom radu posveti preventivnoj medicinskoj aktivnosti. U tom smislu može treneru odobriti ili zabraniti upotrebu raznih rekvizita i posebnih vježbi u trenažnom procesu, vodeći računa o fizičkim sposobnostima igrača odnosno igračica,
- f) da pruži medicinsku pomoć igračima odnosno igračicama za vrijeme treninga i utakmice.

Član 17.

Klubski ljekar ima pravo na:

- a) stručno usavršavanje iz oblasti sportske medicine koje finansira klub,
- b) materijalnu naknadu za izostajanje sa svog radnog mjesta zbog klubskih potreba.

Član 18.

Svaki klub može za svoje potrebe angažovati fizioterapeuta-masera.

Fizioterapeut-maser koji radi u klubu može biti lice sa završenom najmanje srednjom medicinskom školom uz obaveznu stručnu osposobljenost za poslove fizioterapeuta-masera.

Član 19.

Klubski fizioterapeut-maser dužan je da saraduje sa klubskim ljekarom i trenerima svih selekcija kluba i da sprovodi sve terapijske rehabilitacione i fizioterapeutske mjere koje odredi klubski ljekar.

Član 20.

Klubski fizioterapeut-maser ima pravo na stručno usavršavanje o trošku kluba, nadoknadu za izostanke sa svog radnog mjesta zbog potrebe kluba i ostale nadoknade zavisno od toga kako je regulisan njegov status u klubu.

Član 21.

Medicinska komisija Odbojkaškog saveza BiH formira se od ljekara i fizioterapeuta-masera angažovanih za potrebe odbojkaških reprezentativnih selekcija BiH.

Član 22.

Medicinska komisija Odbojkaškog saveza Bosne i Hercegovine dužna je da sačini posebno upustvo u vezi sa medicinskom zaštitom članova odbojkaških reprezentacija sa kriterijumima i obavezama koje treba da ispunjavaju ljekari i fizioterapeuti-maseri koji se angažuju u radu sa odbojkaškim reprezentacijama.

Član 23.

Na ono što nije predviđeno ovim Pravilnikom a vezano je za zdravstvenu zaštitu članova Odbojkaškog saveza Bosne i Hercegovine, primjenjivaće se važeći zakonski propisi.

Član 24.

Odbojkaški klubovi učesnici u stalnim takmičenjima u organizaciji OS BiH odgovorni su za zdravstvenu zaštitu svojih članova.

Član 25.

Tumačenje ovog Pravilnika daje Upravni odbor OS BiH.

Član 26.

Ovaj pravilnik stupa na snagu danom usvajanja na sjednici Upravnog odbora OS BiH.

Član 27.

Usvajanjem ovog pravilnika prestaje da važi Pravilnik broj: 01/1-1068/08 od 05.09.2008. godine.

Broj: 01/1-82/14
Datum, 21.02.2014. godine



Predsjednik
Milutin Popović, s.r